

ERISSET KE MKPA YE EDIDỌK CHRIST KE ENYỌŃ
Mark 15:42-47; 16:1-20; Utom Mme Apostle 1:1-11.

ỌYỌHỌ UKPEP-ŃKPO 435

Eke Ikpọ Owo

IKỌ IBUOT: “Koro afo mudukpoñke ukpoñ mi ke obio ekpo; uduyakke owo ima fo okut mbiara” (Psalm 16:10).

I Edibuk Jesus

- 1 Joseph owo Arimathaea ekemen okpo Jesus, Mark 15:42-45.
- 2 Ekebuk Jesus ke obufa udi, Mark 15:46.

II Eriset Ke Mkpa Jesus

- 1 Ke Sabbath ama ekebe, iban ema eka man ekeyet ufuoñkpọ ke okpo Jesus, Mark 15:47; 16:1, 2.
- 2 Iban ekut akparawa kiet etiede ke ana-iñwañ udi, Mark 16:3-5; Luke 24:3; John 20:11,12.
- 3 Angel ọno mmọ mbuk idoñesit ke abaña eriset ke mkpa Jesus, Mark 16:6-8; 14:28; Matthew 26:32.
- 4 Jesus ama owut Mary Magdalene idem, owut mbet iba ke oro ebede, owut mbet eken idem nte mmọ ediade ñkpọ, Mark 16:9-14; 1 Nwede Corinth 15:5.

III Utom Emi Christ Ọdọñde Mbet Esie

- 1 Jesus ama ọdọñ kpukpru mme anditiene Enye utom ọno ofuri ererimbot, Mark 16:15,16; Matthew 28:19; John 15:16; 12:48.
- 2 Mme idiọño eyetiene edikworo Iko Abasi, Mark 16:17, 18; Luke 10:17, 19; Utom Mme Apostle 2:4.
- 3 Jesus ama ada ediwak idiọño owut Idemesie nte odu-uwem ke usen 40; Utom Mme Apostle 1:1-3.

IV Eñwọño Ete

- 1 Jesus ama owuk mbet Esie ete ebet tutu edoñ Iberedem enọ mmọ, Utom Mme Apostle 1:4, 5; Joel 2:28; Luke 24:49; John 14:16.
- 2 Mbet ekesuk enyenyene idorenyin ebaña obio-ubon ke ison, Utom Mme Apostle 1:6; Isaiah 1:26.
- 3 Jesus asian mmọ ete ke Ete omum ndusuk ñkpọ akama ke odudu Esie, Utom Mme Apostle 1:7.
- 4 Edisana Spirit eyedoro mmọ ke idem ndien mmọ eyedi mme ntiense enọ Abasi, Utom Mme Apostle 1:8; 2:1-4.

V Edidok Jesus Ke Enyoñ

- 1 Ema emen Jesus edok ke enyoñ, osop mmọ ke enyin, Utom Mme Apostle 1:9; Luke 24:51.
- 2 Owo iba emi esinede mfi ọfoñidem edoñ mmọ esit ke abaña erifiak ndi Esie, Utom Mme Apostle 1:10, 11; Mark 16:19; Daniel 7:13; Matthew 24:30; 1 Nwede Thessalonica 4:16; Eriyarare 1:7.
- 3 Mbet ema ewoño ekekoro ikọ ke kpukpru ebiet, Oboñ onyũ ada mme idiọño ọsoño ikọ mmọ, Mark 16:20.

SE EKPEPDE EBAÑA

Ke ukpep-ñkpọ emi, nnyin imenyene mbuk ibaña eribuk, eriset ke mkpa ye edidok Jesus ke enyoñ. Ke ini emumde Enye ye ke itie ikpe, mbet ema esin Enye enyũ efeñe. Joseph owo Arimathaea, owo inyene emi okonyũ edide ọno-item, ama etiene Jesus ke ndibe ke abaña ndik mme Jew. Edi ke ema ekekoro Jesus ke eto, nnyin ikut nte Joseph akade uko-uko ke iso Pilate ekebeñe okpo Jesus. Ñkpọ emi eketiede nte ada ndik esin ke esit ndusuk owo ama ada uko esin ke esit mmọ eken.

Ekedi ido ke eyo oro ndida ndinem utebe aran ntim okpo mbemiso ebuk. Sia ini mikoduhe koro usen Ibet mme Jew ekekperede, ema ebuk Jesus usop-usop ye idorenyin nditim okpo Esie ke usen Ibet mme Jew ama ebe. Ke ndañ-nsiere, iban emi ekamade ndinem utebe aran ema etoño isañ eka ke udi. Okposuk edi nte Jesus ama ekebem iso etiñ onọ mmọ ediwak ini ete ke Imọ iyetoño ntak iset, etie nte mmọ ikomumke akpanikọ oro ikama. Mmọ ekedu ke mkpa-idem, ekop ndik ye nnyek-idem ke ini mmọ ekutde ete ema ekpat itiat efep, ndien angel ọdọhọ mmọ ete “Ekuyak idem akpa mbufo: mbufo eyom Jesus eyen Nazareth, emi ekewotde ke krọs: Enye emeset; Enye iduhe mi: ese ebiet emi ekenimde Enye.”

Udi ye itiat emi ekedade eberi ke inua esie ikekemeke ndimum Eyen Abasi nkama. Enye ekedi Eriset ke mkpa ye Uwem! Ke ini ekekemde Enye ndiset, nkpo ndomokiet ikekemeke ndikpan Enye. Mbon-ekon Rome ema eduono ena nte mme akpa-mkpa. Ufik-nkpo mbon ukara ikekemeke ndibionon odudu Abasi. Jesus ama eset ọworo, akan mkpa, obio ekpo ye udi.

Mbon-ekon ema efeñe eduk ke obio ke ema ekebohọ okposon ndik, enyũn eketiñ enọ akwa oku se ikotibede. Mme idiok-owo emi ema enọ mbon-ekon uyo ete esu nsu, enyũn etie ubion ete ke iyeñwam mmọ edieke eyomde ndida ufen ekon mmia mmọ ke ntak emi mmọ ekedede idap ke ini utom. Edi akpanikọ ke abaña eriset Esie ekedi se ediwak owo ekefiokde ke eyo oro, okposuk edi etop abaña emi okotode mbon-ekon ama akasuana aka anyan.

Eriset Ke Mkpa, Akpanikọ Emi Esoñode

Mbuk eset etiñ oson ete ke Jesus ama eset ọworo ke udi. Eriset ke mkpa edi idorenyin ye mbuotidem anditiene-Christ. Ukworo-ikọ Paul okokon ke Eriset ke mkpa. Okoto ke ntak idorenyin eriset mme akpa mkpa ke ekeda Paul eka ikpe ke iso esop. Ama odu mme owo ke ufok-Abasi ke Corinth emi ekefañade ete ke eriset mme akpa mkpa iduhe, do ndien ke Paul ekewet 1 Nwed Corinth ibuot 15 emi akabarede edi ison idorenyin mme anditiene-Christ ke ediwak isua ton ke ini oro. “Edi edieke eriset mme akpa-mkpa miduhe, ikonyũn inamke Christ eset naña ke mkpa: ... Edi edieke mikanamke Christ eset, mbuotidem mbufo ọworo ikpiku; mbufo ke esuk edodu ke mme idiok-nkpo mbufo” (1 Nwed Corinth 15:13, 17).

Jesus ama owut ediwak nti ikot Abasi idem Esie ke Enye ama ekeset ke mkpa. Ndusuk ini ekedi owo kiet kpot, ndusuk ini owo iba me akande oro, ini kiet efen Enye owut se iwakde ikan owo 500 emi ekebohode oto kiet. Ekedi ke utọ ini kiet ntem ke Enye okodon mmọ utom ete: “Eka ke ofuri ererimbot ekekwo gospel enọ kpukpru owo. Owo eke onimde ke akpanikọ onyũn anade baptism, eyenyaña enye; edi enye eke etrede ndinim ke akpanikọ, ikpe eyebiom enye.” Kpukpru owo, oro edi, owo inyene, ubuene, owo nkoñkoñ itie, owo usuhore itie, ofiok-nwed ye enye emi mifiokke nwed, ekenyene ndikop etop Eti-mbuk. Idighe ibat-ibat owo ifañ, emi Obon ekemekde, ekenyene ndibon erinyaña ndien esin mmọ eken. Ikot emi enyenede “Owo eke amade” akana nte ọworo

asuana, ndien owo eke onimde ke akpanikọ eyenyaña enye. Owo eke minimke ke akpanikọ ikpe eyebiom enye.

Odudu Ndida Nnam Utom

Mbemiso Jesus odok ke enyon; Enye ama odohọ mbet Esie ete ebet ke Jerusalem tutu esine mmọ odudu emi otode ke enyon. Odudu oro eyenọ mmọ ukeme ndinam utom Abasi, eyenyũn onọ odudu ndikan kpukpru odudu asua. Eyeson akpanikọ emi etiñde ete ke mme idion eyetiene ukworo-ikọ mmọ. Mmọ ekenyene ndisem mbufa usem, mmọ ema enam ntre ke ini mmọ ekebođe uduok-mmõn Edisana Spirit ke Usen Pentecost. Jesus ama etiñ nko ete: “Eyemen urukikot ke ubok; onyũn edieke mmọ eñwoñde nkpo ekededi eke abiatde uwem, ididiokke ye mmọ.” Iduhe ebiet emi Obon etemede mmọ ndinam nkpo man owo okut odudu mmọ. Ekenọ mmọ odudu oro ndida ntoro Abasi nnyũn ndi nkpo edidion nnọ ubon owo. Ikanaha mmọ edomo mbom Abasi ke ndikokoi mmen urukikot ke ubok man owo okut odudu emi mmọ enyenede eto Abasi nte ediwak enamde ke eyo emi. Se Abasi etiñde edi inwañ-inwañ ke nwed Abasi. Ke ekperede utit uwem Paul, enye akatañ ifia ndida mbara ikañ, ndien ibom ama eyire enye ke ubok. Mme okoi emi ekedude ke isuo oro ema ekut enyũn edori enyin ndikut Paul nte oduode akpa. Mmọ ema efiok se oruk unam oro ndidom owo ọworođe. Edi ke ini Paul ekekeñde urukikot oro esin ke ikañ, inyũn ikopke ubiak, oro ama otim oson ke iso mmọ odudu emi

odude ke Ikọ Abasi. (Utom Mme Apostle 28:1-6). Abasi eyekpeme ikọt Esie idinyuñ iyakke urukikọt me ibọk mkpa anam mmọ ñkpọ, edieke osimde mmọ ke ndudue, inaha nnyin iwut idem, me iwut ukeme nnyin ke iso ererimbot, man ida ubọñ inọ idem nnyin nte ke imenyene utọ odudu ntre.

Edidọk Jesus Ke Enyọñ

Ke usen 40 tọñọ nte Jesus ekeset ke mkpa, Enye ama owut mbet Esie idem, ke ufọk emi ema ekeberi mme usuñ, ndusuk ke añwa ke mben inyañ. Sia okodude ke ikpọhidem ubọñ, Enye ama ekeme ndibabuat mbet ke ndiwọrọ nda ke ufọt mmọ nnyuñ nsop mmọ ke enyin ini kiet. Ikọ Abasi etiñ ọnọ nnyin ete Enye akada ediwak mme idiọñọ owut idem nte odu-uwem ke ini ndutuhọ Esie ama ekebe. Enye ama ekpep mbet ediwak ñkpọ abañ Obio-ubọñ Abasi. Eketie nte ifiọk mmọ ama otim atara ke Enye ama ekeset ke mkpa, koro mme ñkpọ-ntibe emi ema etim eyarare ediwak ñkpọ emi Jesus ekebemde iso ekpep.

Usen kiet, nte Enye okodude ye mmọ ke Jerusalem, Enye emen mmọ ọwọrọ aka ke Bethany ke obot Olivet. Do, Enye ama ọnọ mmọ akpatre item. Ikanaha nte mmọ esio ikpat ekpọñ “Jerusalem, edi etie ebet se Ete ọkọñwọñọde ndino; emi mbufo ekekopde ke inua Mi.” Do ndien Enye emenere ubọk Esie mbiba ke Enyọñ onyuñ ọnọ mmọ akpatre edidiọñ. Nte Enye osuk ọdiọñde mmọ, ema ebahare Enye ye mmọ, enyuñ emen Enye edọk ke Heaven. Mmọ esuk ese enyọñ tutu ikpa-enyọñ ofuk Enye, mmọ inyuñ ikwe Enye aba. Nte mmọ esuk ewukde enyin ese Enyọñ, angel iba emi ekedade ekpere ete mmọ: “Mbufo mbon Galilee, nsinam mbufo edade ese enyọñ? Jesus emi, emi emende Enye ekpọñ mbufo eduk ke Heaven, eyedi kpa ido emi mbufo ekutde Enye ọnyọñde oduk ke Heaven.” Mmọ ema efiak enyọñ eka Jerusalem ye akwa idara. Nso oruk ukpuhọre okodu ke uwem mmọ idahaemi, akan nte eketiede ye mmọ ke okoneyo oro mmọ ekebukde Jesus ke obufa udi Joseph!

Eridi Jesus

Enye ke ọtọñọ ntak edi! Mme ikọ oro esin idara ke esit nti ikọt Abasi ke mme ediwak emana. Nnyin imonim ke akpanikọ ite Enye iditreke ndidi. Emi edi idorenyin emi ọyọhọde ye ubọñ emi enyenede Ufọk-Abasi, ñko nnyin ke isuk ikpakpañ utọñ kpukpru ini ibet uyom obukpọñ ye mkpọ archangel.

Nso utọ isen-isen usuñ ke Abasi ekemek ọnọ edima Eyen Esie mi ke isọñ! Usuhọre emana ye mkpa but, edi eriset emi ọyọhọde ye ubọñ! Mme usọp-usọp ñkpọ-ntibe ema eda itie ke ekpri ini. Ema etap Eyen Abasi, ekọñ ke eto, esuhọre esin ke udi, ndien ke usen-ubọk ọyọhọ usen ita, Enye eset! Isọñ ama enyek, mme itiat esiaha, mme udi ekubọre, ndien mme angel ema esuhọre edi ke isọñ enyuñ ekpat itiat efep. Christ, Eyen Abasi, ama ayak uwem Esie onim man ọkpọtọñọ ntak ọbọ ada.

Ke ama ekeset ke mkpa, Enye ama ebemiso ayarare Idemesie ọnọ eyen-añwan. Ñwan ekedi akpa ke edinam idiọk-ñkpọ, enye ñko okonyuñ edi akpa ke udi, ye akpa ke ndikut Andinyaña emi ekesetde. Ekebem iso eyak etop Eti-mbuk enọ ñwan: “Ka . . . kobuk.” Enye ekefehe aka ndisian nnyuñ mbuk utibe etop idaresit ete ke Jesus, Eyen Abasi, ama obuñ odudu mkpa ndien ke ododu uwem idahaemi, oro edi, ke ododu uwem ke nsinsi!

Koro Enye odude uwem, nnyin iyenyuñ idu uwem ñko. Eti-mbuk emi ọyọhọde ye ubọñ! Anie ekeme ndisin enye? Enye akakpa ke ntak idiọk-ñkpọ nnyin; Enye ekeset man etebe nnyin ikpe. Enye ama ọdọk ke Enyọñ; Enye ke ọtọñọ ntak edi. Paul akabat kpukpru ñkpọ ke ntak-urua man enye ekpekeme ndibọ Christ nnyene nnyuñ mfiọk Enye ye odudu eriset Esie. Nte nnyin imabat kpukpru ñkpọ ke ntak-urua man nnyin ikpekeme ndibuana ke Ntañ-ndọk? Nte nnyin ke isesin idem eti-eti man ikeme ndidu ke mbeñidem ke ini Jesus edidide? “Ọfọfọn ọnọ owo emi enyenede udeme ke akpa eriset” (Eriyarare 20:6).

MME MBUME

- 1 Anie okobuk okpọ Jesus ke obufa udi esie?
- 2 Jesus ekebem iso owut anie idem ke ini Enye ama ekeset ke mkpa?
- 3 Anie akakpat itiat efep ke inua udi?
- 4 Nso utom ke Christ ọkọnọ mbet Esie?

- 5 Mme anie ke edinyaña? Mme anie ke ikpe edibiom?
- 6 Siak mme ini emi ekeikutde Jesus ke Enye ama ekeset ke mkpa.
- 7 Enye ọkọdọk ke enyọñ ke ebiet ewe?
- 8 Nso etop ke mme angel ekenọ ke ini Jesus ọkọdọkde ke enyọñ?
- 9 Nte emi akada idara me mfuhọ esin ke esit mbet?
- 10 Nso ikedi akpatre ewuhọ emi Jesus ọkọdọkde mbet Esie?